



kinderombudsman

het beste besluit:
geef kinderen invloed



E mihó desishon pa bo

Preparashon pa mucha i hóben riba e
kòmbersashon ku un profeshonal



Tratado di Derecho di Mucha: e mihó desishon pa bo

No ta importá kuantu aña bo tin òf di unda bo ta: nos tur tin derechonan. Pues abo tambe! Lèinan i reglanan tei pa abo haña loke bo tin derecho riba dje. I pa protehá bo si mester. Asina Hulanda a palabrá huntu ku otro paisnan.

Ombudsman pa mucha ta kontrolá si gobièrnu i otro organisashonnan ta tene nan mes na e derechonan di mucha. Esakinan ta skirbí den e Tratado di Derecho di Mucha. Bishitá nos wèpsait pa mas informashon, www.kinderombudsman.nl/kinderrechten.

E mihó desishon: duna mucha influensia!



Kontenido

- 4 E derecho di duna bo opinion
- 6 E kòmbersashon ta ku bo i ta trata di bo
- 7 Lista di pregunta: kiko abo ta haña importante i kiko nan mester sa di bo?
- 9 Na final di e kòmbersashon
- 10 A tuma e desishon. Kiko awor?

E derecho di duna bo opinion

Tin biaha, adulto ta tuma desishon ofer di bo. Pensa riba un direktor di skol, un hende ku ta duna asistencia, un ámtenar di leerplicht òf un trahadó di korporashon di bibienda sosial òf gobiernu. Nan ta disidí por ehèmpel si bo mester bai otro skol, kua yudansa ta duna bo, unda bo ta biba òf si bo ta haña but pa falta skol.

Ombudsman pa mucha ke pa nan skucha abo promé. I ku no ta tuma desishon promé ku a papia ku bo. Pasobra abo tin derecho di duna bo opinion. Adultonan mester tene kuenta ku esei. E buki aki ta yuda bo prepará pa e kòmbersashon ku e adulto ku ta bai tuma e desishon ofer di bo.

1. Boluntario


E kòmbersashon ta boluntario. Esei ta nifiká ku bo no tin nodi di duna bo opinion si bo no ke. E ora ei, e adulto lo mester puntra otro hende kon bo bida ta i kiko abo ta haña importante. Esei mester ta un hende ku bo ta konfia i ku por splika bo historia bon. Abo ta disidí ta ken esei ta.

2. Un lugá seif i kómodo

E lugá kaminda e kòmbersashon ta tuma lugá ta importante. E lugá mester sinti kómodo i seif pa abo. Pensa kiko bo mester pa por sinti bo asina. Bo por bin e kòmbersashon ku algu ku ta yuda bo, un peluche, por ehèmpel. Bo ke bin e kòmbersashon ku un hende ku bo ta konfia? Indiká esaki na e adulto ku ta bai tuma un desishon ofer di bo.

3. Informashon

Ta duna bo tur informashon importante promé ku e kòmbersashon tuma lugá. Tin algu ku bo no ta komprondé? Pidi pa un splikashon. Bo tin derecho riba esei. Bo ta haña difísil i bo ke yudansa? Pidi yudansa di un hende ku bo ta konfia



Pa e adultonan ku mester tuma un desishon ofer di bo, nos a traha un buki tambe. Den dje tin informashon tokante di kon nan mester prepará pa un kòmbersashon ku bo i kua preguntanan nan por hasi na bo. Por haña e buki aki riba wèpsait di Ombudsman pa mucha, www.kinderombudsman.nl.

PAGA TINU! Bo tin derecho di duna bo opinion. Pero si bo no ta bai e kòmbersashon, e adulto ta bai tuma un desishon komo sea. Pues hasi un esfuerso pa bai.

E kòmbersashon ta ku bo i ta trata di bo

E adulto ku ta tuma e desishon mester sa mas tantu posibel ofer di bo. P'esei, ta importante pa bo prepará bon. Bo por hasi esei ku e preguntanan di ehèmpel riba página 7 i 8.

Lesa e preguntanan di ehèmpel bon i purba kontestá nan di e mihó manera posibel. Bai ku bo kontestanan e dia di e kòmbersashon.

Bo ta haña esaki difisil, òf bo no sa e kontestanan? E ora ei, kontestá e preguntanan di ehèmpel ku sí bo sa. Òf pidi yudansa di un hende ku bo ta konfia.

Bo no ta logra? No wòri, durante e kòmbersashon bo ta bai repasá e preguntanan huntu ku e adulto.

TEP! Di kua desishon e kòmbersashon ta trata?

Skirbi den dos òf tres frase di kiko e desishon ta trata.

Por ehèmpel, e ta trata di unda bo ta bai biba, ki yudansa bo mester òf kua skol bo ta bai.

TEP! Skirbi e kontestanan den e app di tuma nota den bo telefòn

Saka un screenshot òf potrèt di e preguntanan di ehèmpel ku bo telefòn. Pone e potrèt den bo app di tuma nota i skrbi e kontestanan bou di dje. Bo no tin telefòn? E ora ei, skrbi bo kontestanan riba un blachi. Bo por traha un dibuho tambe òf saka potrèt ku bo telefòn di kosnan ku ta importante den bo bida.

Lista di pregunta: kiko abo ta haña importante i kiko nan mester sa di bo?

1. IDENTIDAT

Ken abo ta?

- Unda bo ta biba? Kuantu aña bo tin?
- Bo ta mucha hòmbler òf mucha muhé, òf bo ta sinti bo diferente?
- Kua pronòmber bo ke pa nan uza?
- Bo tin ruman?
- Bo mayornan ta kreyente? Abo tambe?
- Bo tin famia afó?
- Bo gusta mucha hòmbler, mucha muhé òf tur dos? Òf bo no gusta ni un di nan?
- Kiko ta e kos ku mas bo gusta hasi?
- Kiko nan mester sa di bo pa e desishon aki?

2. PROTEKSHON I SEGURIDAT

Bo ta sinti bo kontentu i kómodo?

- Unda bo ta sinti bo mas kómodo?
- Kiko bo tin mester pa sinti bo kómodo i seif na kas, na skol òf serka e hende ku ta duna bo asistencia?
- Unda bo ta kere ku nan ta kuidá bo mihó?
- Ken bo ta kere por kuidá bo mihó?
- E ambiente ku bo ta biba aden ta kambia frekuentemente?
- Bo sa eksperensíá ku diferente hende ta kuidá bo?

3. FAMIA & AMIGUNAN

Ken ta e hende(nan) importante pa bo?

- Bo ta biba serka bo tata i/òf mama?
- Bo mayornan a divorsíá?

- Ken ta e hendenan importante den bo bida? Pensa riba tawela i/òf wela, amigunan, bisiñanan, mucha ku bo ta bai klup òf deporte ku nan.
- Ku ki frekeunsia bo ta preferá mira nan?
- Di ki manera bo ta preferá tin kontakto ku nan?

4. MOMENTUNAN ÈKSTRAORDINARIO

Kiko bo a pasa aden?

- A sosodé kos agradabel òf difísil ku ta importante pa e desishon aki?
- Kiko hende mester sa di bo?
- Kon bo ke pa hende trata bo?

5. SALÚ

Kon ta bai ku bo?

- Kon ta ku bo salú, di bo kurpa i di bo mente?
- Kiko bo tin mester pa ta salú òf keda salú?
- Bo mester di kuido? Por ehèmpel di un sikólogo, dòkter òf guiadó.
- Aktualmente bo ta hañando e kuido ku bo mester di dje?

6. ENSEÑANSA

Kon ta bai na skol òf na bo estudio?

- Bo ta bayendo skol awor, i bo gusta skol?
- Òf bo ta studia? Bo gusta bo estudio?
- Kon ta bai na skol òf na bo estudio?
- Bo ta sinti bo kómodo? Einan ta seif? Nan ta tenta bo?
- Bo mester di algu pa por siña mihó òf sinti bo mas kómodo, por ehèmpel: guia òf un lèptop?

7. BO OPINION

Kiko abo ta haña ta e mihó desishon?

- Kiko bo ta haña ta e mihó desishon, i dikon?
- Kiko abo lo preferá, i dikon?
- Kiko ta e kos di mas importante den bo bida? Por ehèmpel: ta serka bo mayornan, hasi kos prèt, hasi deporte, lèsnan èkstra òf kuido serka di bo.
- Kiko bo ta haña ta importante pa bo futuro?

Na final di e kòmbersashon

Na final di e kòmbersashon ta importante ku huntu boso ta wak kon a bai. E kòmbersashon tabata agradabel? E lugá tabata seif? E adulto a komprondé bon kiko ta importante pa abo? Ta kla kiko pa abo ta e mihó desishon?

Repasá tur e temanan huntu ku e adulto. Por hasi esei por ehèmpel ku guia di e chèklist 'E mihó desishon pa abo, un chekeo lihé!'. E chèklist aki ta riba nos wèpsait, www.kinderombudsman.nl. Bo por a bisa tur kos? Si no ta asina, bis'é.

Despues di e kòmbersashon aki, e adulto ta tuma un desishon. Bo tin pregunta tokante esaki? Hasi bo preguntanan. I palabrá kon e adulto lo tené bo na altura di kon ta sigui.



A tuma e desishon. Kiko awor?

Nan mester spliká bo e desishon. Nan mester konta bo tambe di ki manera nan a tene kuenta ku bo opinion. Tin algu ku bo no ta komprondé? Pidi pa nan bolbe spliká bo. Ta bon pa nan skirbi e desishon riba papel pa bo, pa asina bo por bolbe les'é mas aworó.

Bo no ta di akuerdo? Puntra e adulto kiko bo por hasi pa kambia e desishon. Tin biaha esei ta posibel. E ora ei, nan mester bolbe wak e desishon.

Bo tin duda òf bo ke yudansa?

Bo no sa kiko bo tin ku hasi? Semper bo por pidi yudansa di un adulto ku bo ta konfia. Tambe bo por tuma kontakto ku Ombudsman pa mucha. Bo por yama nos tur dia di trabou entre 06.00 - 11.00 uur (bo ora lokal) riba number +31 70 8506 995 òf manda un email na ombudswerk@kinderombudsman.nl.

Kiko ta pasa si nan a tuma e desishon sin papia ku bo?

Nan a tuma un desishon sin papia ku bo? Nan mester a hasié sí. Ku e chèklist 'E mihó desishon pa abo, un chekeo lihé!' bo por chèk riba ki puntonan el a bai robes. Laga e adulto ku a tuma e desishon sa ku no a tuma e desishon di e manera korekto, i pidi pa un desishon nobo. Kisas bo ta preferá hasi esaki huntu ku un hende ku bo ta konfia. Si bo no ta logra hasi esei, yama e Ombudsman pa mucha. Nos ta bai wak si nos por yuda bo.



E foyeto 'E mihó desishon pa bo, preparashon pa mucha i hóben riba e kòmbersashon ku un profeshonal' ta yuda mucha i hóben skirbi nan opinion. Asina nan por prepará pa un kòmbersashon ku un profeshonal ku ta bai tuma un desishon tokante di nan, por ehèmpel un direktor di skol, un hende ku ta duna asistencia, un ámtenar di leerplicht òf un trahadó di korporashon di bibienda sosial òf gobiernu.

E foyetonan '4 paso pa yega na e mihó desishon pa e mucha, un ayudo pa profeshonal' i 'E mihó desishon pa abo, preparashon pa mucha i hóben riba e kòmbersashon ku un profeshonal' i e chèklist 'E mihó desishon pa abo, un chekeo lihé!' ta forma un konhunto.

A basa e die foyetonan i e chèklist e splikashon di e Komishon di Derecho di Mucha di Nashonnan Uní (UN).

Por haña nan riba e wèpsait di Ombudsman pa mucha, www.kinderombudsman.nl.



Kinderombudsman

Postbus 93122
2509 AC Den Haag

+31 70 8506 995
djaluna te ku djabièrnè
di 6.00 or te 11:00 or (bo ora lokal)

ombudswerk@kinderombudsman.nl
www.kinderombudsman.nl

© Ombudsman pa mucha,
Den Haag 2023